



~ 16
 2346
 3



和
2346
2/3

記言卷之十二 中篇

族氏

陽川許氏族譜序

族氏之書古太史所職周官小史奠係世辨昭穆春秋祭酺族師書孝友睦婣有學者其有不孝不友不睦不婣者大司徒以鄉刑糾之而主孝嗚呼聖人之教遠矣祖而父父而子子而孫諸父分於祖兄弟分於父由再從三從以降至於族子族孫係屬愈遠親愛愈踈然推其本則出於一祖實一氣而分故人之性莫不知愛類



而相仁蓋聖人之治因其性而帥之以仁此周
官之教也族譜之書周官奠係世辨昭穆之遺
也吾族氏出自駕洛譜牒所記自我孔巖村主
以後著於譜牒號為甲族自得姓來二十六世
七世凡七百餘年說部曰許氏終麗五百年作
相者十一人堯樞者六人學士九人尚主者五
人仕於元者二人封君者十四人至本朝相三
人贊成二人六卿四人功臣三人學士十二人
又自我 仁孝以來名臣貴人又不止一人二
人而已可謂祖先積仁累善之報也我八世祖

典理判書始修赤內族圖其後忠貞公金文敬
公草堂相繼增修之又其後竊翁傳其事使後
生苗裔皆知某祖出於某祖某祖分於某世某
為昭某為穆共守世訓以篤仁愛亦族譜之教
也辛亥臘月五日穆謹序

聞韶族契序

周典小宗伯掌三族辨親疎之政令禮子姓兄
弟雖出於再從三從死而無服吊死則袒免娶
妻則同姓不相娶皆不忘厥初本乎親親者也
雖昭穆疎遠推其所自出則一祖而分不可以

疎遠而視之如路人後來族契之作其義出於此今者聞韶族契其契式辨昭穆叙親愛喜有慶憂有恤行有餞時有會以講信修睦敦孝悌厚風俗殆古之遺教嗟乎世道既下善俗日敗古事古禮今不可復見僕於此重為之歎息而識之 上之十年孟春下浣孔巖許穆記

韓氏八祖族圖序

人有族類雖所重在一祖然推其先本血氣之分仁愛之理外親亦然九族之內雖疎遠亦不可如路人推父而有祖有外祖推母而有祖有

外祖推祖而有祖有外祖推祖母有祖有外祖唯外祖有祖有外祖推外祖母有祖有外祖至其身母論子姓異姓為四世九族八祖壽考之家及事四世者有之其高曾之先人固不知者寡矣至於外親知者或寡矣其祖其祖母常言若祖若外祖云三世四世子孫不知不知則疎疎則如路人無怪也今韓氏八世族圖古人親愛不忘本之遺意也人之道莫善於親親周官司徒之職教萬民有六行曰孝友睦婣任恤睦親於九族婣親於外親聖人之治重親親如此

三代之教民善俗今於韓氏族圖見之矣不亦善乎韓本高麗大姓完山之世著於國牒慶州之鄭全義漢州二族海平豐壤興驪三族亦皆名家舊姓 上之九年十月上浣眉叟序

壽考

慶壽宴圖記

萬曆三十年我 昭敬大王三十五年秋承政院啓曰前叅議李遠有老母今年九十九聖人之治當有老老之典 上感其言厚賜之至明年正月 上曰李遠之母今年百歲自今歲首

賜餼廩有常加爵其子以賞之於是李公進嘉善大夫由同中樞為右尹推恩三世為大夫尋改少秋官遂拜京圻觀察使其九月置酒上壽諸公卿百官之長畢集觀其慶京城為之謠曰母以子貴子以母貴熙熙壽母公伯其子時之卿大夫有太夫人承養者十家晉興君錦溪君尹判書韓叅判洪中樞南叅判李中樞晉昌君驪興君尹叅知權少正姜翊衛李中部為十三人以明年四月大合宴上壽名曰慶壽宴因白上上加賜之令諸道供給其物及日 賜舞樂

以樂之其位次百歲夫人以上壽最尊姜相國
貞敬夫人某氏以命婦最貴皆中堂南向其下
八太夫人各以命數為序東西相向諸夫人侍
宴各從後列既序禮畢晉興君以下諸公皆陞
堂再拜子孫衣冠而侍列者十九人折衝將軍
文荃國子典籍弘立獻納讓最顯其在執事之
列者又十六人以次各舉觴上壽其樂方響節
鼓管絃登歌下舞當時事太史氏既書諸冊以
張大之間巷之父老相傳為美談今已六十餘
年矣韓叅判父 仁祖世以 王后父貴至領

敦寧尹叅知為大司憲權少正為掌令李中部
為嘉平太守尹獻納為代言李折衝為節度使
諸執事子孫又入相者一人繡衣升朝者七人
為臺省者一人出宰百里者六人今諸公皆已
歿惟李中樞南錦山在世李中樞百歲夫人之
親孫今年八十二嘗守數郡頃年以壽增秩為
中大夫南錦山南叅判之長男當年最少今
亦白首由考工少卿嘗出為錦山太守百歲夫
人前古名人蔡公壽之從女生於弘治甲子歿
於萬曆丙午歷三萬六千甲子為一百二歲云

觀察公七十歿有二姊皆九十樞府公又八十
餘可謂壽考之世也樞府公之子灌以其尊大
夫之命圖畫其事并記諸公官爵姓名年次屬
陽川許穆記之 上之八年孟冬下澣奉正大
夫前任司憲府持平許穆記

貞敬夫人宋氏挽詩 并序

原任判中樞趙公前年以大年進階崇祿大
夫冬大夫人宋氏卒色養七十年昔老萊子
行年七十事親不怠自古傳之今公行年八
十衰麻感容即位哭吊者大悅今以月日葬

亦其禮可觀穆作挽詩五章其詞曰

棘芳藥方邦之壽考栢柳輅車大奠壽母母以
子貴禮儀孔式黼荒畫帷鼈甲三尺黻翟畫翟
御用白茅鸞車五乘太牢五苞乘人專道三百
勸防蒙魑揚楮毆却方良奠而即遠贈以纁玄
交以神明神明之器槃匱南流水衡芻靈厚德
之報無裁無省神道安寧

己酉司馬試回年榜會序

萬曆己酉國子試士當 宣祖世歷 仁祖
孝宗之世至 上之八年二百九十六甲子周

矣同榜諸公李叅判八十一尹敦寧九十一洪
中樞八十五稽之三代之禮皆在國老乞言惇
史之年者也當年李叅判才弱冠擢為壯元其
文章膾炙一時稱傑作至今傳誦未已况其人
在世乎三老以其年月日行同榜會循次宴集
李叅判孟夏節後十日庚辰尹敦寧仲夏節前
七日甲午洪中樞月半偃之伏五日丙午也皆
以壽考重修前甲子古事可謂勝跡而亦世之
所罕有也未知太史氏書其事以侈治世美事
乎或落莫否嗟乎今已數年月日李叅判尹敦

寧已作古人洪中樞好德康寧八十七年余竊
觀中樞公宴集述懷二作雅健文彩不衰異哉
上壽之老知有不衰者存焉并識之 上之十
有二年小暑節孔巖許穆眉叟序

壽族

洪裕孫南陽人佔畢弟子文章甚奇自號曰篠
叢子燕山時有史禍禍及士林善類皆死篠叢
子潔身竒偉以壽終其子至性博於百家既無
所不通教授千人亦以壽考聞又其子贊天雖
不及其先人亦八十古人自我 莊憲時至我

純孝之世二百七十餘年洪氏三世云

記言卷之十二終

記言卷之十三 中篇

棟宇

竹西樓記

東界多名區其絕勝八如通川叢石亭高城三日浦海山亭迳城永郎湖襄陽洛山寺溟州鏡浦臺陟州竹西樓平海越松浦遊觀者獨稱西樓為第一何也蓋濱海州郡關嶺以外東盡大海其外無窮日月迭出怪氣萬變海岸皆池或匯為大澤或矗為奇巖或鬱為深松自習溪以北至箕城南境七百里大體皆然獨西樓之勝

隔海有高峯峭壁西有頭陀太白巍峩巖崿浮嵐積翠巖岫杳冥大川東流屈折為五十瀨間有茂林墟烟至樓下層巖蒼壁千尋清潭脩瀨灣洄其下西日綠波潏潏澹灩巖壁別區勝槩與大海之觀絕殊遊觀者其樂此而云云者耶考官府故事樓不知作於何代而至皇明永樂元年府使金孝宗修廢墟起此樓洪熙元年府使趙貫施丹榭其後四十六年成化七年府使梁瓚重修之嘉靖九年府使許確增作南檐又其後六十一年萬曆十九年府使鄭惟清復重

修之自 太宗永樂元年癸未至清主稟熙元年壬寅為二百六十年樓下古有竹藏古寺樓有竹西之名蓋以此云仍誌之以為竹西樓記

西別堂重作記

上之二年余出守陟州州稱西樓之勝為東界絕景然樓最高登臨覺風氣絕殊悽然有去國之感傍有荒園廢觀號曰西別堂草木蕪沒堂頽毀不可遊處園林多怪石前對峭壁高崖蒼然佳趣可愛柳子厚所謂奧之宜者也公事閑暇日遊其間忻然樂之迺改掾易棟正其面勢

指日就役堂成而軒檻楹楠無侈於舊而庭院
既闢剗剪翦歲佳樹離立層巖蒼壁竒狀畢出
林影扶踈尤宜於月夕烟朝每衙罷無事常讀
書倦則鼓琴而嬉其鼓琴之銘曰絲聲切廉而
不誇也一盈一反天地之和也噫琴者禁也禁
其邪也

凝碧軒題額記

凝碧軒真珠館之上西軒也在西樓北巖壁上
臨潭水榭棟極壯麗其西檐下開巖逕有石梯
正德中有府使金順宗作此軒觀察使尹豐亨

命名曰凝碧軒軒當頭陀列岫茂林蒼崖潭瀨
皆碧軒無揭額但有嘉靖間府使申光漢作凝
碧軒四時詞題壁余用墨葛作軒名三大字掛
之壁上字三板畫如藤葛仍書曰陽川許穆書
時壬寅孟秋

遊羽化亭序

羽化亭者安翔邑治之東江上亭也自臨湍上
流數郡之界安翔獨稱江山之勝此也絕岸巖
壁上江上人指言臺且百年稱絕景今太守李
侯以無事訪山水古事得斯丘樂之作臺上亭

以臨寥廓高明遊息之具蓋亦有時而成者也
前後有茂林岡巒江岸皆白礫其上平蕪江流
灣洄上下渺茫東有大川南流過峭壁合於亭
下有古渡有長橋峽俗人事絕稀道無人沙上
有被蓑持網者數人相呼語余老於漣上與端
翔二郡太守湄江李君遊相樂於此正月大寒
雪古木多枯死三月無花然時已孟夏江上多
樹林深陰適雨新晴佳趣自多於是李君作羽
化亭記屬余為序 上之八年四月甲戌孔巖
許穆眉叟序

侯為郡之明年改作鄉校五架兩楹一門既成
禮事畢修羸其餘力作臨江閑館其勝槩冷然
倍之吾聞高明之感治道之所出故古人有不
謀於邑而謀於野者信矣亦豈徒為遊樂之觀
而已不可以不識之也侯諱山賚字重而延陵
人穆識

四樂堂記

公子朗善君於其堂寢南新作特室本先公子
次舍而歲久頽圯黝暗不可居處因舊制易以
新之公子閑暇蕭散無他玩好室中圖書滿架

樂觀書以時遊戲翰墨以自娛庭中有古松殆
百年枝幹蟠屈多奇狀如蛟螭蚪虬攫拏蒼葉
赤幹宜於風宜於雨宜於雪宜於月可蔭數百
人養雙白鶴夜無人萬籟俱靜松下聞鳴鶴使
人忽忘城市之塵喧超然遺物足以養壽命而
窮年者也堂名曰四樂四樂者何書一圖二松
三鶴四皆公子之所樂者也 上之十一年仲
春吉日眉叟書

樂悟亭記

三江之勝西湖最大漢水至露梁龍山中分為

二水過西江龍首復合流渾渾泱泱西注海門
高岸長洲崛嵬磧歷別島沙渚瀰漫其鳥鴻鴈
鳩鵲鷗鷺燭玉其草蕪葭菰蘆青蘋牧人之犁
牛羝羊妾子之桑醫師蒔藥漁子設網臨江絕
景宜於春渚宜於月出宜於浦雨宜於暮雪樂
浪耽毛羅漕舶萬里魚鹽百貨舸艦迷津閭閻
且千列肆互市謠俗富樂登岸踈木巨樹臺榭
相望又有閑人逸士漁樵問答自古記之今有
太學上舍李錫亨泰仲少讀書選博士弟子五
十不成名歎之曰士得志則富貴光顯有命焉

不得則閑暇適志亦在我棄舉子業捐其貨易
龍山江上丘壑幽者治園林築水亭日漁釣自
娛忻然曰樂矣吾乃今知悟之晚也名其亭曰
樂悟之亭老人聞其事心竊喜識之具著西湖
記勝凡二百七十餘言

伴鷗亭記

在臨津下

伴鷗亭者前古昇平相黃翼成公亭也相國歿
近三百年亭毀為耕犁棄壤且百年今黃生相
國之子孫結廬江上居之仍名曰伴鷗亭以不
沒其名亦賢也相國之事業功烈至今愚夫愚

婦皆誦之相國進而立於朝廷之上則能佐
先王立治體正百僚使賢能在職四方無虞黎
民樂業退而老於江湖之間則熙熙與鷗鷺相
忘視軒冕如浮雲大丈夫事其卓犖當如此野
史傳名人古事相國平生寡言笑人莫知其喜
怒當事務大體不問細故此所謂賢相國而名
不沒於百代者也亭在坡州治西十五里臨津
下每潮落浦生白鷗翔集江上平蕪廣野沙渚
瀰滿九月陽鳥來賓其西距海門二十里上
之六年仲夏既望眉叟記

後凋堂記

後凋堂者 世祖名臣權翼平公舊宅堂在木
覓北麓秘書監東巖石之崖 世祖幸其第後
世迄于今稱云其西崖有石泉命曰御井其上
有素閑堂遺址在焉堂三間南有溫室冬就溫
夏就涼不尚奢華蒼崖夕照戶牖蕭灑制作古
遠自相國之世歷數百年六傳而至司徒公迺
始重創之不改棟易楹亦不加增飾其傾圮者
完黝暗者新堂宇如舊堂廡南泉出石下極清
冽堦礎下皆山石盤陀庭畔層壁尤奇三月山

花盛開滿園多松冬寒至柯葉不改太史公稱
歲寒然後知松栢之後凋此所謂後凋堂警戒
之義也地勢高觀望止麗華山白岳仁王列岫
禁苑穹林層宮高闕建官立市治道之所出百
貨之所殖四方輻輳經緯九軌紫陌萬井與義
溪鶴洞並稱南山勝區司徒公二世有師傅蹟
穿堂前石池苔深水清巖影畢照師傅有男歆
好方正能博文善行吾以為權氏有人歷舉前
代古事古跡請余後凋堂記文成三百志之我
大行十五年冬十月辛丑

記言卷之十三終

記言卷之十四 中篇

田園居一連上

十青園記

吾衰懶不治人事於蔣花灌園有獨好也然窮
嘆其榮枯隨變快然不樂多植柯葉長青者若
檜栢檀樅老松蔓松篁竹杜冲吾平生好山澤
之遊今老矣徒懷想渺然園中積石為竒峯秀
嶺間植石草之穆穆者冬夏長青石色雨過益
蒼然得此為園中佳玩為十長青名吾園曰十
青園吾老無事常讀書倦則吟哦自暢或拽杖

逍遙適雨新晴林影蒼蒼每歲寒雪霜交墜萬
木凋枯獨吾園深翠可愛眉叟記

十青佳樹皆取冬青多壽木

松形如偃蓋其葉食之令人不飢長年其液入
地千年為茯苓史記曰松為百木之長其上綠
苔曰艾納香又曰狼苔

栢樹西向得金之正氣其性堅有脂香烈禹貢
荊州貢栢栢茶止血滋陰

檜說文亦曰圓栢東海作舟唐時檜有一枝再
生宋興亦有此異壽木

五葉松葉五出松類實大服之功力倍之多生
深山海上謂之海松

萬年松多生海上謂之藤香香氣清冽葉條無
刺者佳性惡人烟氣山僧燒之以事佛

竹竹譜曰不剛不柔非草非木或生巖陸或茂
沙水條暢敷芬篁竹曰淡竹又曰甘竹竹實曰
練實

紫竹曰苦竹又曰董竹尤堅勁可為笛其實通
神明

榲生南海上者佳曰玉榲又曰玉山果亦曰赤

果說文曰文木也其木甘其葉冬青山榧一也
山榧叢生不高

卷栢生石上本草曰治五臟邪益精冬青

麥門冬本草曰安心神調中止嘔冬青

怪石禹貢青州貢怪石說文曰石山石也廣韻
曰山體為石增韻曰山骨也石千年長一尺

石鏡記

莓苔古石得日月之光毫末畢照刻之曰日

月石作石鏡記

吾嘗步於林園得一石不方不圓亦非奇形異

狀荒草下有石蒼然者大於斛忽然晚之莓苔
間若水光之澄洞者有之得日月之光毫末畢
照視不可矚山澤間有神姦物怪莫得逃其形
使人大驚疑若鬼神焉名之曰日月之石移之
堦石上令鑑之者亦以戒懼其幾心戊戌孟夏
日長至眉叟識

古梅樓子大年說

有青萼梅樛幹老查謂之大年古梅樓子黃粟
紅花謂之大年樓子樓子龍洲公庭植佳品古
梅出於寒山翁龍洲公八十四寒山翁八十七

今二老皆亡其植物留傳石鹿巖居巖居老人
且八十可謂植物古事大年者識壽也台嶺老
人書于不如默社

大明紅說 辛亥作

前年大旱大水大風又節前霜墮 七月晦 百

穀不成又今年無麥民大飢大疫國中四方
死者不可計數五月六月七月積雨三月戒
同社人連瘞餓孳聞海老亡嘆息不樂見林
園荒草中有大明紅數莖花發可憐感古事
書之

大明紅者東方無此花紅花紫葉黑莖葉小高
數尺七月花開花葉五出如栽香冽為異花花
出自中國東方傳植之謂之大明紅云燕京既
破黑漢令天下已三十年而人心不忘古如此
昔者壬丁大亂 天子前後徵發南北官兵十
八萬人出內府三萬金山東粟十萬征倭師旅
之後國大飢又發江浙十二萬粟以賑之東民
至今愚夫愚婦皆知帝力不敢忘者此也嗟乎
自古亡國非一或以諸侯或以強臣或以夷狄
其本皆出於壬人婦寺亂政敗國寇乘之彼既

竊國之柄專威福制命脅權相仇至國破家亡
身逢誅滅而不戒何哉大明自天啓以降權移
宦寺卒亡於盜夷狄亂華蓋已天下大亂今見
秋雨一草花亦足以感天理識之以自寓十二
年孟秋下弦一日癸酉台嶺老人書

林居遣興 四時

連西古漳州三十里有四世丘墓之寄而自
前古無士大夫居之峽俗樸駭老人居於此
二十年常無事寓遣者十事

其一五月山花盛開巖隅幽鳥相號

其二林深日晏陰崖宿霧未捲

其三曉日疊山晴霞

其四雨餘隔林溪響

其五雨霽前溪水生步出漁磯理釣絲

其六溪風吹雨或落照含山

其七日夕山氣益佳林外墟烟暝色

其八月夜群動皆息坐愛林影扶疎 寫真曉

其九秋生暮峽烟嵐紅樹千重

其十積雪滿山澗邊深松蒼翠可愛

立春箴二

帝出于震萬物發生母變天之道母絕地之理
母亂人之紀

盛德在木母斫大木母覆巢母殺胎歿掩骼埋
啣簡稼咒修稼事

養鶴

龍洲翁遺我隻鶴養之園中先鶴群過則仰而
鳴其聲甚遠一日有獨鶴過之回翔不去者良
久可謂同類相求已酉仲夏

韻會曰鶴丹頂素翼青脚長喙說文曰鶴鳴
九臯聲聞于天
陸佃曰鶴始生二年子毛落三年產似七年
飛薄雲翥後七年學舞又後七年舞應節又

後七年晝夜十二鳴鳴中律六十年不食
物大毛落背毛生色白雪百六十年雄雌相
視不轉而孕千六百年飲而不食
韓詩外傳曰鶴胎生
正義曰鶴二七六十年色純黑謂之玄鶴

石鹿草木誌

松狼苔茯苓栢檜海松紫楨藤香杜冲樺竹卷
栢麥門冬見園中十青

雲銀杏一曰白果又曰鴨脚葉類之也魯夫子
壇有此樹謂之杏壇壽木

栢本作楠述異志楠木一年東榮西枯一年西
榮東枯名曰交讓木成都寧觀有四古楠皆千

奔鹿車百兩刻云由人蘧君所植
楓香一曰白膠香本草主風痒隱疹齒痛楓一
名聶化漢武愛楓宮殿多植之故曰楓宸南中
有老楓類人形曰楓靈

桐禹貢曰嶧陽孤桐莊周曰鳳凰非梧桐不止
三月桐始華秋氣至則桐葉先零蔡邕傳有吳
人燒桐以爨鬲聞火烈聲爆請削為琴號曰焦
尾琴有頽桐夏花如火有胡桐出西域

梅天下尤物揚州人呼白揚梅為聖僧紅勝於
白紫勝於紅有重葉梅有綠萼梅有百葉細梅

有鴛鴦梅多葉紅梅也有江梅遺核野生者有
古梅其枝膠曲蒼蘚鱗皴一蒂雙實曰杏梅淡
紅花謂之臘梅非梅類本草梅收肺氣調胃
丁香

牡丹本草曰天地之精百花之首易老云治神
志不足神屬心志屬腎心腎之藥白者補紅者
利牡丹五十種姚黃為花王魏紫為王后山中
花開葉單者入藥天下名花稱洛陽牡丹花
芍藥芍灼也灼灼其花根能治病本草曰潤肺
燥滋腎陰出杭越茅山者佳劉貢父曰天下名

花洛陽牡丹廣陵芍藥芍藥三十種生山中者
入藥

射干本草曰開胃下食散熱破痲痺司馬相如
上林賦曰藁本射干香草也

芭蕉生嶺南者有花有實極甘美清熱止渴生
北地者有花無實

石菖蒲生石澗一寸九節者通僊靈本草曰通
九竅開心孔聰耳目久服延年菖蒲一名菖歎

又曰堯韭根大節踈者菖陽
菊花本草曰滋陰去火久服黑髮延年菊為養

性上藥史正志菊譜曰花有落者有不落者花
扶踈者多落爾雅菊一名落蕋或曰日精或曰
周盈本草曰節花又曰更生又曰陰成

記言卷之十四終

記言卷之十五 中篇

田園居二

吳司寇東郊別業記

前司寇亞卿吳公新葺東郊別墅名其堂曰歸
來之堂堂南小軒曰寄傲之軒堂北階上小扉
曰日涉之扉出小扉登山麓有四松松下小臺
曰盤桓之臺庭東作短籬種菊其下九月落英
可殮門巷樹五株柳亦自號曰東溪公間暇郊
居感陶淵明歸去來之作而寓物自暢如此善
乎足以寵辱俱忘昔蘇子瞻慕淵明既細和洲

明詩又如歸田園田舍擬古諸作尤疊疊焉者亦此意也別墅在東郭門外籍田西安巖山麓陂陀深松隱隱前有平川白沙其外廣路見關王祠觚稜白盛又其外東池荷葉溝塍千井東岡有僧院北山有石浮圖南望終南冠嶽清溪列岫山城雉堞連雲去城市不遠每清夜無人聞鐘聲遠響此皆別墅幽趣勝槩并識之

時雨亭記

天啓中觀龍門從迦葉下入舍奈小洞溪水清淺石巖噴坑其中謂之李文僖公先代壽藏云

有僧舍可遊至今五十年見東陽都尉石洞時雨亭記當年無此亭文僖公長男延川君之作也攷其年月蓋在二十年後而今亭頽圯主人已三世前年修其廢墟新作溪上亭亦曰時雨亭其命名古事都尉已誌之矣時雨之義尚矣夏正鞠見而雨水參伏而穀雨月今日在胃天玉命司空曰時雨將降下水上騰修堤防達溝瀆晝婺女正中天王以盛樂雩為百穀祈甘雨夏日至大雩上帝山川百源百辟卿士有益於民者徂夏大雨時行傳曰征後興作怨咨旱乾

水溢四方無虞民不怨不咨風雨以時年穀大
穰黎民富樂此時雨之瑞也老人自萬曆之世
嗟乎至今康熙十年塵治亂興亡七世七十七
年追感古事舉月令夏正以付時雨亭記主人
延川君嫡孫名某字某上章閣茂毅兩節眉叟
記

雙栢齋銘序

安山

韓氏馬遊海庄有古木雙栢齋其先人舊業云
韓氏名德亮字明仲謂老人曰海濱壤壚豬澤
多魚鹽多樹藝先人舊居有雙栢樹亦先人所

植下肖追慕之感又不特丘墓之寄而已顧長
者教之也善乎言也亦孝子之心也子之先君
子賢而沒名老人嘗銘其墓忠敬篤厚好文學
累試不利恥之耕釣海上不求不競居家信順
有潔身高行而不見知於世其嚴祀親親謹節
皆古人事也殆古之所謂隱德者也禮曰敬其
身者敬其親也故君子一舉足而不敢忘父母
一出言而不敢忘父母况其居室植木皆莫非
先君之思顧其身戒懼不敢怠在此可不敬乎
因銘曰

敬之哉居於斯作於斯寢食於斯篤不忘孝子
之思敬之哉

慕寒齋記

晉州

慕寒齋者吾友謙齋叟山居別業有巖泉茂林
脩竹其意慕晦翁之寒泉云其側溪上臺曰咏
歸臺叟與物間暇亦其樂可知叟潔身隱居
上累召累不至非其義也一介不以予人亦一
介不以取諸人囂囂而樂義又其巖居之樂詩
所謂考槃之寬者也今叟亡而其門弟子以叟
知老人老人知叟請一言以識君子古事

上章閻茂夏正日長至山口嶺老人記

記言卷之十五終

記言卷之十六 中篇

祠 說文曰祠者報福也

道山祠記

達城都護判官權侯大載既莅官辨治正其戒
 令糾禁召父老問鄉邑舊俗得高麗壯節公古
 事耆耆相傳麗俗為壯節公死以每歲春秋良
 日燃燈齋祀於智妙佛寺仍指言古戰場童子
 皆誦之侯慨然嘆之曰禮以死勤事則祀之能
 捍大患則祀之列其德善功烈以報食百代者
 固不限當世異世祀者禮之厚而教之至也於

是父老大悅乃立祠於道山古之所謂桐藪者
而其側廢墟亦麗人燃燈古寺云嶺南節度使
申公汝哲以其苗裔子孫也亦出財力以助功
役既廟成釁用刳耳乃以吉辰修祀事父老咸
會籩豆有序禮數不愆事神教人為善俗之本
而亦禮之大節也君子勉焉侯以老人猶能言
前古事令追述禮祀俱著忠臣之烈以識之不
亦善乎古事千年祀享有時鬼神有食教行於
人事重禮大穆雖甚耄老其敢以辭讓為事乎
稽之麗史太祖十年甄萱破新羅遂殺王盡取

其子女寶王百工兵仗以歸時王徇康州聞新
羅急親率精騎五千至公山下與萱遇戰於桐
藪不利萱圍王急將軍申崇謙金樂力戰死之
王以輕騎遁去萱既乘勝連克雞子碧珍遺王
書以誇矜戰勝首言左相樂暴骸於原野云二
人裴洪申卜之倫其功烈事業固為名臣首而
將軍樂亦與元甫在忠擊破大良虜其貴將三
十人王因下百濟諸城二人者卒能死而成志
禮所謂危身奉上死原野而不辭者也忠臣義
也其立名成仁可謂百代之表廟享有常信所

謂捍大患以死勤事之報也其傳曰宣方園王
急時將軍崇謙貌類王乘王車與將軍樂力戰
死之王以二人為王死於節召二人子並為元
尹崇謙特謚曰壯節後加贈太師云

三賢祠記

衿川縣寒泉有三賢祠三賢祠者高麗姜太師
徐掌令及我宣祖功臣完平李相國祠也太
師事文宗顯宗攷典禮修國社定方丘坎壇之
制立百官儀當契丹南侵君臣大恐將束手乞
為臣僕太師正色守禮以義自固義明而人悅

服人悅服而國益強卒克破契丹王嘆之曰守
禮義不舉國為左衽忠臣之烈也擢至內史侍
郎平章事累加太師封開國侯致仕卒謚仁憲
事在麗史本傳徐掌令當麗之末世見危不去
及益陽死廢為庶人國亡居衿川義不忘故國
坐不吐向終其身不對漢陽城郭託物吟哦以
自傷或論甄謳歌思亂當抵罪太宗曰甄夷
齊之倫不可罪也至宣祖世有宰相尹根壽
白上封忠臣塚李相國事宣祖當邦國大
亂盡瘁驅馳以存社稷按節關西西民生祭以

報之開府南方南人信之如神明光海無道壞滅人紀相國曰國亡當受其敗諫而不去光海以為謗已踈而逐之然賴其言人心益明此天也仁祖元年復為中興相以身佩國家安危前後四十年八十八卒謚曰文忠相國相三朝尊治體重儒術好節儉明進退之義四方歸心稱宣仁世恢復名臣首此數賢者其賢宜報食百代况祀典曰法施於民則祀以死勤事則祀以勞定國則祀者乎今奉天謂之姜太師鄉其生有祥星降信耶邑居址十里燔塘有徐掌

令墓蓮城境悟里洞有李相國世葬初相國與鄉黨父老議立二賢祠未成而相國卒後二十五年鄉人并祠相國號為三賢祠其立祠之年今上即位之九年戊戌也其九月上浣孔巖許穆記

三峯祠記

誌曰洪州三峯有崔瑩祠禍十四年我太上回軍禍廢瑩死之後其神最靈能作禍福殃慶有慢不敬者立死鄉之人驚恐嚴祀之又立迎神望神之祠麗史本傳曰崔瑩者司空惟清五

世孫也狀貌魁偉以膂力少隸楊廣軍為烈士
恭愍元年趙日新作亂瑩與安祐崔源擊斬之
拜護軍三年從元丞相脫脫伐高郵二十七戰
皆勝之又禦賊于淮安和泗之間大戰斬首虜
甚衆還擊倭大破於西海八年紅頭陷西京瑩
為西北邊兵馬使伐賊有功拜西京尹十一年
合諸將兵二十萬人伐沙劉關先生斬之賊衆
死者十餘萬人遂復京城十二年金鋪謀舉兵
犯興王行宮瑩急擊賊盡殺之拜門下贊成辛
毗嫉之譖王貶為雞林尹尋削官放流之二十

年有倭寇急召拜六道都巡察掌黜陟諸將不
用命者皆令自斷明年為楊廣全羅慶尚諸道
都統使發三道兵二萬五千伐濟州叛者胡石
迭里必思古肖禿不花觀音甫等平之二年擊
倭於鴻山破之又大戰於海豐大破之倭中相
戒曰畏避白首崔萬戶云十年拜侍中謝病上
都統印綬乞解兵柄禍不許及 太上回軍以
瑩決策攻遼因巡軍鞠之流忠州竟斬之瑩節
儉好直諫禦軍三十年攻城陷陣必身先士卒
百戰百克未嘗敗北臨刑嘆息曰我生不作惡

業無過而死我死草不生塚都民為之罷市聞者皆流涕棄屍於道行者皆下馬而過之其塚在高陽謂之赤塚四年高麗亡後謚武愍

龜山祠碑

龜山祠者龜巖李先生祠也先生修道德自見事我恭憲王致尊用為大司諫副提學東都尹初以甲科進為父母已老乞補外終養凡十九年為政必以教化為先故所至皆有賢人之化東都作西岳精舍順天府作景賢堂在諫院陳治道累數百言我昭敬王立屢召皆不起

上書陳勸戒皆至論居萬竹山中教授生徒囂囂而樂義先生少受業於圭庵卒聞大道於陶山於是玉溪德溪二君子皆推賢之後有隱者鄭斗先生論次其言行出處終始甚詳蓋以為靜而寬嚴而有容直而不較好古樂善謹喪祭薦恩義其學克勤於人事之易知易能而推至於性命之奧為醇然云嘗輯性理遺編景賢錄又有遺稿傳於世先生姓李氏諱楨字剛而別號曰龜巖泗川人先生生於正德七年卒於隆慶五年為六十萬曆三十五年鄉人立祠故里

命曰龜山祠因刻石其事

記言卷之十六終

記言卷之十七 中篇

丘墓一

六臣疑塚碑

世宗名臣有朴彭年河緯地成三問俞應孚李
塏柳誠源號爲六臣事在六臣本傳所謂六臣
塚者在西湖露梁下江岸上世傳古時僂人於
此云皆刻石曰朴氏俞氏李氏成氏之墓蓋朴
氏之墓最在南次北曰俞氏之墓又次北曰李
氏之墓又次北曰成氏之墓而又有成氏之墓
在其後十許步間自古以爲成氏父子之葬而

其在後者成勝墓云嗟乎六臣之死不知其收
葬者為誰刻石表其葬者又為誰蓋皆沒其跡
後世莫知也六臣者親戚皆死噍類不遺必有
賓客慕義不以禍故相負竊各識其屍列葬之
如此因刻石表其處而故匿其名為某氏某氏
如婦人之表耶其心良苦有秋江處士作六臣
列傳又著書時之賢人節士之行頗記之詳矣
然而不言六臣之葬何也此皆當時事不可知
者也嶺南一善府有河氏之墓獨柳氏無葬處
其傳曰聞謀泄知事不濟自剄死之吏追取屍

磔之云然則施刑先後不同磔死人其地又不
同其收葬處異耶或不幸而終無葬處耶嗟乎
皆不可知也湖西洪州有成氏之葬忠州德面
里有朴氏之葬成氏有外子孫相傳所謂成氏
之墓藏其一體云朴氏之墓亦如此未可知也
或曰蹤跡已泯氓俗相傳不可盡信其言固然
此不過江上父老相傳至今不知其初孰見而
孰識之也於今既無古事可徵不可執以為必
信又不可拒以為必不信但恐自此千百年後
世益遠氓俗益不傳墟墓之變并其疑信而泯

沒則志士之追恨無窮况仁人孝子之心乎朴
氏有六世孫今東宮左翊贊崇古封其墓表其
處屬余俱記其疑信欲不沒於後世嗟乎亦仁
也因銘曰

忠臣之埋志士之悲氓俗之傳百代之疑西之
人深目而髯得其實者伊誰

上之三年辛卯仲夏日長至後學陽川許穆著

荅朴翊贊書

吾子不辱以僕雖衰鈍尚有所聞知問六臣塚
事僕安敢不盡所聞以負左右古人之行也西

湖六臣塚直西古木荒臺吾前代二憂亭也所
謂六臣塚者指而相傳至吾身且四世矣僕童
子時從先人亦親見其封域不變朴氏俞氏李
氏成氏上下二塚共五墳皆有短碣而石刻剝
落字多漫滅然猶識其刻跡可見前時有權貴
人等別業西湖其人無忌憚江上多有名人塚
墓於是其大小碑碣或踏或碎所謂六臣之塚
幾失其傳幸而其碣踏者立之碎者亦不失故
處此皆吾先人事後其權貴人敗江上葬人日
多群塚纍纍成氏二墓其一雜於群塚而其碣

亦失之嗟乎先人已下世僕遭亂流落且千里
追思前日事已三十年愴懷良多昔時 章陵
之遷除道於六臣塚下時僕有一弟適在江上
且先人在世使之立守之令毋犯其塋域復有
畿伯追使人嚴立禁戒云僕常恨之河氏柳氏
不知葬處柳氏劉自殺吏追取屍磔之施刑先
後不同收葬處異耶抑不幸而終無葬處耶當
時事不可知也然此其初江上人傳說而已無
他古事可徵後世之疑又惡可謂必無也然其
疑不疑不須言也為之修墓刻石疑信俱著令

不沒於久遠則雖千載之後有悲其義者亦想
見當時事尤有感於斯者矣又不特為子孫傳
此事而已也不宣四月十九日穆頓首

魯陵相皇甫公墓

魯陵相皇甫公墓在坡州泉站西勃興官道上
考其年月魯陵二年公既被禍立標其葬在
恭僖十四年為六十七年當禍子孫皆死今皇
甫氏已絕世其收葬而又表其葬者皆沒其名
後世莫知也識之以附坡平古事其墓表之文
大刻永川皇甫公之墓又小刻公諱仁魯山朝

首相景泰癸酉靖難時并二子一孫被禍二十
二字末又刻曰正德己卯二月立石
上之七年丙午四月上弦後二日穆識

記言卷之十七終

記言卷之十八 中篇

丘墓二

耘谷先生銘

先生原州人姓元氏諱天錫字子正高麗國子
進士見麗氏政亂隱居獨行號曰耘谷先生及
麗亡入雉嶽山終身不出 太宗累召不至
上高其義嘗東遊幸其廬先生避匿不見 上
下溪石上召守廬嫗厚賜之官其子洞為基川
監務後人名其石曰太宗臺臺在雉嶽覺林寺
傍今原州治東十里石鏡有耘谷先生墓又前

一墓孺人之墓云初先生有藏書六冊言亡國古事戒子孫勿妄開其書傳之累世有子孫一人竊開之大懼曰吾家族矣舉而燒之其書不傳猶有餘遺詩什所謂詩史者也吾聞君子隱不遺世先生雖隱世自隱非忘世者也守道不貳以潔其身伯夷之言曰古之士遭治世不避其任遇亂世不為苟存天下暗矣不如避之以潔吾行故其傳曰歲寒然後知松栢之後凋舉世泯亂清士乃見孟子曰伯夷非其君不事非其民不使治則進亂則退伯夷聖人之清者也

先生蓋伯夷之倫也鄉人為之立祠以祀之祠在州北三十里七峯稽其世牒始祖戶長克富克富生宗儒宗儒生倉正寶齡寶齡生倉正時俊時俊生精勇別將悅悅生宗簿令允迪允迪生天常天錫天祐天常進士或曰仕顯於本朝無所考天祐縣令孺人元氏宗簿令廣明之女非一元族氏以為原有兩元是也長男訖直長同正次男洞基川監務先生後世子孫甚眾基川之世最大其贊曰

巖穴之士趣舍有時縱不列於世能不降其志

不辱其身教立於後世則禹稷夷齊一也先生
可為百代之師者也

簡易堂墓誌

公諱崑字立之姓崔氏別自號東臯嘗讀易易
其號曰簡易堂云我 恭憲末以古文進其序
曰公好讀班固韓愈書為文章不得不書每一
篇出人爭傳誦之弱任冠擢壯元文章益有名
顧阨於時官不大顯然 上奇其才毋拘以分
職令管承文院事委之以詞令後出為扞城太
守三年上周易口訣四卷後四年著洪範學記

五百餘言皆百代之文其文章闕深簡嚴古雅
可法東方文學殆千載一人國家人才之盛極
於我 恭憲昭敬間賢能並用公高才敏識卓
出千古當國難兵連之日使价交道動天子威
靈以排患釋難一時詞命多出於公於是其文
重於九鼎大呂鵝谿箕城詩卷跋云崑與公同
年生同年及第其生蓋嘉靖十六年 穆宗皇
帝生後三年冊封皇太子之歲也萬曆二年間
為晉州詳定貢賦其文案序曰自縣至都護府
凡五任而來牧晉州云及壬辰大亂 車駕西

狩之明年代甄城尹自從 上行在所因掌詞
命咨奏書大小四十四前後三八京師上書三
十三其四頒行會典事也餘皆存國亡國之憑
也後出東郡時則日本關白家康既滅平氏族
類來請和之年也後四年以濕痿病乞休沐時
荅嶺南崔使相書曰年至致仕君喪在身不得
自引辭就云又四年公歿故遺文九卷至稀年
錄而止父自陽成均進士母茂松尹氏公幼不
慧於言過十年始讀書甫成童陞太學於文益
不學而能也既通於文以窺道德之博竹南公

曰嘗師事之嚴重有儀使人莫敢慢易云子東
望萬曆十六年及第仕不達終龍岡縣令無子
又有庶孽子二人曰東聞東觀今東聞年六十
能傳家世古事居高陽之鳧嶼為丘墓鄉云
仁祖世有詞臣白 上言豈以文名世死而其
書無傳請刊行之公沒四十年其文始行

簡易堂碣

公諱豈字立之姓崔氏父自陽國子進士公少
孤不慧於言生十年始讀書甫成童陞太學文
章日有名於世二十擢上第當 恭憲王十四

年前後領邑七 昭敬王二十六年守甄城尹
後為司寇亞卿當壬辰兵革國大亂日請救於
天子大發兵征倭 上常令公毋拘以分職兼
管承文院事掌詞命咨奏書大小四十四前後
三八京師上書三十三其四頒行會典事也餘
皆存國亡國之急也於是其文重於九鼎大呂
後出為汧城太守上周易口訣四卷作洪範學
記五百餘言公平生好讀班固韓愈書其文閱
深簡與古雅可法東方文學千載一人公七十
三沒葬高陽之鳧嶼初公別號東臯後易之以

簡易云子東望亦以文學進終龍岡縣令無子
又有庶出子東聞東觀二人 仁祖世有詞臣
李廷龜白 上曰豈以文章名世沒而無傳請
刊行其書公沒四十年其文始行簡易堂遺文
二十九卷

其贊曰自高麗中世以後文學甚盛李相國牧
隱最著聞李相國特雄偉本朝諸名家作者亦
不為不盛而簡易諸作特瓌健簡與獨傑然可
為千載一人云

湖陰遷葬陰記

吾東方文學之盛自古記之說者曰國初諸作
稍變舊裁之以雅麗自新羅歷數千百年其間
高才傑出者如崔學士李相國牧隱佔畢諸老
之作能頡頏唐宋氏而李相國最大才自我
中明以來以詩名家者亦多百餘年間湖陰之
詩特稱於後世何也其叙曰天才絕倫自髫髻
知讀書日記累千言文章卓然早成遂顯於一
世吳太史稱之曰若流峙動植變態吐納音律
謠俗一寓於吟哦而長於風為詩溫厚和平奇
怪而不譎於是皇華酬唱之作大傳於天下今

有湖陰詩什行于世者累千篇當湖陰之世稱
多才學之士如魚叔權李鵬翔林芑盧瑞麟權
應仁之徒皆出湖陰門下名其時至今公諱士
龍字雲卿其姓鄭氏湖陰別號也今湖陰舊業
在宜春縣鼎湖上世祖名臣東萊君蘭宗之
孫昌原都護光輔之子中宗相光弼之從子
也弘治七年甲寅生十六陞上舍十九選博士
科繼以魁科貴歷事四朝至宣祖六年癸酉
以領中樞卒年八十墳墓在揚州今其三世孫
之問能言郭璞李淳風之術葬而子孫之貧富

窮達禍福壽夭無毫髮失嘗卜葬於永平之龍
化吉一朝遷其三世之葬公之墓歷八十餘年
乃改葬云

記言卷之十八終

記言卷之十九 中篇

丘墓三

李持平陰記

公諱弘業字時立姓李氏本慶州人高麗門下
侍中齊賢之後也三世祖龜既名顯矣死於燕
山甲子史禍 中宗元年追爵承政院都承旨
大父洙珍山郡守父愷胤義盈庫令母盈德鄭
氏副司直允義之女也公萬曆七年丙科及第
初選承文院陞博士丙戌由兵曹佐郎出為高
敞縣監辛卯入為司憲府持平忤時議貶鏡城

都護判官其年有倭寇國大亂北路既陷二王子皆被執列郡爭縛長吏以降賊公亦為賊所得閉之幽室而妻李氏子婦尹氏皆自殺其十月北方早寒南寇不耐風雪又聞遼左兵來救乃大懼為媾書逼令王子大臣皆署以公嘗為近臣令遣公行在所約和公拒之曰不可以此書往賊怒待王子益惡諸從官皆面諾曰可行矣善為之陰私語以送之公乃行謁世子於成川為大臣所拘持以為賈賊書辱國送行在所當論死公從獄中三上疏言王子困迫狀搯腕

忍不自決臣來時王子諸臣私謂臣曰賊書固不足說幸而得達行在所則上必引見具陳賊勢圖出王子機會難得私相勉之臣罪萬死上意哀之柳相國成龍亦曰當恕減死流吉州公感歎思愁日吟哦自遣號逋世翁四年以息除囚籍因寓居居山驛一年客死居山年五十八二年歸葬分石山下男以健為司憲府監察女二人二婿奉化縣監趙廷純士人蔡承吉孫彥茂以善行聞為松羅察訪孫子壻三人洪漫丁好悌尹相好悌進士外孫蔡氏有一子應先

又庶出孫二人彥茂之子三人泰來泰陽泰萬
泰來亦善士不幸早歿公在龍灣獄歷叙平生
作述懷賦以自悼公長於詞賦累官累斥卒遭
窮抑以沒其身命也

朴平山碣

公諱震英字實哉姓朴氏其先本密陽人後世
徙江右之咸安遂為貫籍三世祖榴為務安縣
監 恭僖世以大年秩從二品大父宗六乃贈漢
城府右尹父昨贈刑曹判書母李氏贈貞夫人
籍慶州贈兵曹叅判景成之女也公才識異等

豪舉有氣槩亦不肯屑屑為名壬辰之亂與郡
守柳崇仁募兵伐賊義兵將郭再祐召公欲留
之公謝曰既與人約為死生背之不可郭公心
賢之不復言留時當大亂慨然以騎射發身時
二十六其年有父憂以列士起復從元帥幕府
雖在戎間私則居處有禮府中賢之己亥為龍
宮縣監自此十數年間無薦引者官不過諸府
判官癸丑為慶興都護府使時藩胡數叛邊邑
人口虜獲甚衆公悉以貨贖歸及茲巡察使權
縉召拜中軍仍上其功能陞折衝將軍己未為

順川郡守兼右營將前年遼左陷敗遼民渡江者雜於民間其強者攻劫以取足為民患日多公為約束官恤其餓者而其不從約束者不假然後主客相安人心大悅贊畫使李時發巡行至郡閱兵有軍中士欲售其才能立發砲墮飛鳥一軍大喜當賞公曰不可軍中聽於將無令發砲有軍法無軍賞贊使稱謝不果賞關西御史一人因恥過不快於公既復命言不法欲黜之諫官金時讓曰臣知此人素以廉直見嫉功多而官卑人心惜之其人慙無以言以治理仍

作者二年為海西道防禦使明年李适叛時都元帥張晚軍平壤公往從之适聞之曰帥府諸將惟南以興朴震英柳孝傑數人而已為間書言除君側之惡而封外書南以興柳孝傑朴實哉云以興方為帥府中軍元帥知其為間以公為別將倚信之加甚元帥曰适所領精兵降倭數萬我兵不滿數千其勢不可當彼諸將士有不從者為誰公曰李胤緒不死則必欲有為也公得胤緒蒼頭過者一人諭以大義欲遺書遣之即許諾以此具告元帥乃為書言義不從賊

既署顧同列曰諸君何如皆相顧不肯惟以興孝傑二人從署胤緒已決死無他意見書即與李慎柳舜懋李玘陰與謀夜三鼓皆應砲各以所領兵潰陣出者三千人胤緒見元帥自言在賊中不殺賊無面目立於世也遂自刎以死賊間出慈山直趨黃州元帥乃始出兵前騎遇賊潰於新橋公發憤罵曰敗軍者當斬不可貸也及賊入京 上已南狩元帥後令諸將欲從西湖渡兵而南南以興鄭忠信等不從其令促兵已先據鞍嶺大軍繼之公與申景瑗軍東郊迺

戰敗為其下所殺及論功賞公陞一資而已不預行封而公口不言功公為平山都護府使兼海西防禦使其年罷歸鄉里因不出前時諫官金時讓為嶺南按使巡行海上訪公於田舍曰何為不仕公謝曰以無能受恩已厚又何求也時讓為之嘆息而去每閒暇無事喜鼓琴亦不彈世俗之樂觀書手不釋卷自丙子大亂後忼慨不樂日飲醉自遣時撫劍太息夜則仰觀星文而已 仁祖十九年七十三卒於匡廬山下葬於同郡仇音谷追爵崇政大夫判敦寧府事

兼判義禁府事五衛都摠府都摠管公平生尚
節儉好施予睦宗族嚴嫡庶疾病戒諸子曰謹
守禮法毋墜家訓無他語尋卒貞敬夫人魚氏
籍咸從贈漢城府右尹應海之女生二男世龍
亨龍庶出男五人庾龍任龍起龍子龍見龍庾
龍栗浦權管任龍積城縣監女六人二人直長
尹恭之節度使南斗柄妾四人嫁為南斗格權
復慶金鼎耆郭智立妻銘曰
忠不見巧廉不見容順受其正窮亦不愠汙濁
之戒良善之勸

靜嬪閔氏墓誌

靜嬪閔氏系出驪興高麗名臣門下平章令謨
之後也曾大父諱子芳尚 康靖大王女敬淑
翁主為驪川尉大父諱希說冊陽郡守贈吏曹
叅判父諱士俊江華都護府使母孟夫人籍新
昌國初相思誠之六世孫也隆慶元年九月二
十九日嬪生 宣祖即位之十三年冊淑儀始
十四歷昭儀貴人陞嬪為最貴侍 至尊三十
年恭敬畏慎無一私恩干澤之事 上心敬之
每燕見必冠 懿仁王后亦禮遇殊甚當兵革

之世從 上西幸備嘗艱難及 上登遐持喪
過節退居私第積疾十九年 仁穆太妃甚尊
禮之每以手札問起居謙下有禮一以內訓自
律好儉約常以溢充為戒不御錦繡珠翠私奉
養孟夫人至誠不怠撫恤宗族踈遠不遺 仁
祖世連有大獄長男仁城君連獄辭事在鄭文
簡公寬獄疏 上赦處原州嬪常泣思及疾革
少男仁興君上疏乞母子相見 上感其言寬
釋之未至而嬪卒天啓六年十一月二日春秋
六十 上為之吊賻特厚令中貴人抵喪葬之

事明年正月十七日以禮葬揚州之塔谷生二
王子三翁主仁城君珙仁興君瑛貞仁翁主下
嫁唐原尉洪友敬貞善翁主下嫁吉城君權大
任貞謹翁主下嫁一善尉金克鎮仁城君五男
海平君佶海安君億海原君健海寧君伋海陽
都正僖仁興君二男朗善君侯朗原君侃內外
子孫甚多銘曰
貞而靜淑而慎安而信三宮儀式是順是勸是
訓

北青判官李公碣

公諱純馨字季薰姓李氏始祖德源君曙世
祖諸王子生蓮城君澗蓮城君生仁江君樑仁
江君生錦溪君仁壽公錦溪君次子而為後於
叔父錦平君義壽少學文章於崔簡易二十七
成進士光海五年永昌獄起搢紳大陷鄭仁弘
之徒有李偉卿者在太學首發廢母后之議人
心大懼莫敢有異議者公慨然曰倫紀滅矣與
太學諸生三百人上疏言倫紀事故相李文忠
公諫而得罪又與進士洪茂績鄭澤雷等連上
疏極言太后既閉之西宮諫者皆得罪而公禁

錮且十年癸亥 仁祖既反正事得解辛未初
筮仕為義禁府都事乙亥登增廣及第以資窮
為承文院判校尋出為北青都護府判官丙子
亂南漢受圍四十餘日公傳檄郡縣召集義
兵得三千人將入援巡察使聖徽合南北精兵
勤王公軍永興給餽餉時清人業已講解而歸
官軍遇戰於安邊大敗前月 上出南漢已令
諸鎮罷兵矣公罷兵之邑為清兵所追躡入窮
北僅免清人既擊破巡察軍所過屠殺列城大
潰皆怨之曰巡察使之故也彼心內媿不安嘗

不快於公以為敵人歸路至甲山空無官守某
實任其咎以聞於朝公卒以此廢人心益不服
公平生好大節深原有雅量少有公輔之望不
幸窮抑以沒其身公以非罪坐廢未嘗感感見
於色詞教授生徒以自娛 仁祖二十六年二
月一日公年六十九歿後月葬坡州龍池山下
淑人仁同曹氏長子云灌次子云漸皆無子少
子云濟生二男三女其一子斗星為云灌後餘
幼有庶出女一人壻曰慶寓銘曰
榮辱倘來君子不貳直道在我窮亦樂義

梁寧邊墓銘

公諱應深字彥容姓梁氏本南原大姓五朝宰
相梁誠之六世孫也曾祖谷山郡守允精祖司
憲監察思訥以壽考進折衝將軍父閻早世追
爵戶曹叅判母李氏敦勇校尉思安之女 太
宗子孝寧大君補之六世孫也公傑魁有大志
學書不成名去之三十一選武舉初授宣傳官
以才選兼任籌司郎一年為利城縣監後三年
春以都摠都事為明川縣監其年以縣陞都護
府適為刑曹佐郎 宣祖末年為平壤府判官

後六年為泰安郡守方光海政亂為官者多以
賄賂得仕恥之耕田自給不復覓官求仕十年
仁祖五年奴連陷西京城擾亂上出幸江
都公杖劍從上叙為軍器副正明年朝廷與
奴絕和親選將帥公陞折衝將軍為關西兵馬
虞侯一年移寧邊大都護不悅於時宰罷公平
生好廉潔為官前後二十年不以一毫干人亦
不以一毫累已也十年七月廿九日公歿年六
十三其九月葬坡州之城山梁氏族葬公嚴重
有威儀寡言笑能博達世務臨事裕如落落不

肯事權貴公卒以此窮閒暇田里樂臨川釣魚
善草隸有仁孝善行教行於家有二弟應源以
孝聞應涵連帥邊鎮以清白名男侑倪儼皆以
兄弟善居家稱之儼亦善草隸淑夫人申氏籍
高靈寶城郡守汝灌之女與公同年生先公二
十年四十四歿公出泰安之年四月十七日也
其葬與公同原而雙墓者也三男一婿婿慎英
弼侑生益恂益忱益恬益悌益憬婿元梓倪生
益三儼生益泰益鼎婿韓德亮銘曰
駑駘之駟驥之恥鉞刀之利鐵劍之棄曾謂

干城之傑終焉田里之棲棲者耶

權景得銘

國子生負權公諱貴中字景得其先本永嘉人
始祖高麗太師事在麗史曾大父典牲署參奉
贈戶曹參判振大父同知中樞 贈議政府領
議政東興府院君常在 明宣之世以孝特聞
父行承政院都承旨禧亦近世賢大夫也母李
氏豐德郡守榮緒之女中古賢公子朱溪君深
源之四世孫也公以名家之世才學早著二十
四選司馬試泮宮士多敬重之者有事必就問

之 仁祖十三年李珥成渾從祀文廟之議始
起公與太學諸生上疏言二人疵累忤時議去
而無愠色直而方確而重好經術博覽自丙子
大亂之後因不出三十年名益賢有掌銓選欲
推薦之者公謝去卜居臨湍耕牧自給以至老
權氏先墓在臨湍者五所遠者過數百年悉修
其墓收墓田募人守之以供墓祀不絕也其九
世祖正獻公以下三世之墓在津東栢木谷六
世祖江界府君墓在栢木南十里江上坎巖五
世祖佐郎府君墓在長西彰慶里公生於萬曆

十七年己丑八月七日歿於上之九年戊申
正月五日年八十娶全州李氏儒生淪之女也
與公同年生有婦德善行居家理而事舅姑克
順一門稱其賢三十六歿天啓四年甲子十月
七日後四十五年公歿遷其葬合葬於臨湍泉
谷未向之原有一男曰大均女適叅奉南宮焜
生三男塾堅塹塾進士大均無子以堂姪子德
三爲後有庶出子大平生總純德種銘曰
才全而不售德巨而不發世之闇耶天道之回
沈耶

穆頃年書先大夫碑東溟鄭學士撰此碑無
一言一事溢美先大夫立朝四十年當時事
亦有耳目所及者論譔賢大夫之美所張大
者非一而其稱述善而不伐勞而不施斥而
不愠數者而已孝子之欲顯其親於後代者
其誠慎如此今公生而既不見知於世又沒
而無傳朋友之責也葬而無銘猶無葬其孤
大均爲之出涕謝叙列其先人事來示余亦
其事實其言質無澤於其外一如其先人之
所志者蓋其賢有自表而書之以揚人之善

云

藤庵處士銘

萬曆末穆從先人累官大嶺之南初識公於居
院客館公自守嚴取與正樂稱君子之風穆心
敬之其後寒岡鄭先生歿相吊於加麻之列相
阻十餘年因南中士求見前賢遺籍其年有上
變事連累良善公以縲紲入京持五先生禮說
授之曰吾死不負矣既赦還之數年穆避亂大
嶺之外從長者益聞所不聞每過公以老德事
之頃年間公之喪哭於寢門之外其葬也爲之

作哀詞今遺有二孤既三年喪畢將表其先人
之墓走人千餘里問銘於穆穆以慕德之誠不
讓論撰公善行表著者書諸石曰公才識過人
少師事寒岡先生得聞君子之教能力學累選
公車不幸遭先將軍非命不復求舉沒名不出
力作以養母有一弟幼孤公心愈苦教訓不怠
有過則涕泣而撻之學日就名聞南州此裴尚
虎季章也陸太學無命早歿公哭之傷心益不
樂人事從武屹巖泉以至老別號曰藤庵或薦
其賢公不肯顧亦終無推挽者以歿公平生好

善無窮規人之過若恥之在己也其薦行自親
親仁愛推及踈遠一門皆勸教家嚴而有恩所
重冠婚喪祭公諱尚龍字子章姓裴氏星州人
大父司宰監正德文父嶺南水軍節度使楔皆
追爵戶曹叅判母貞夫人宋氏籍冶城忠順衛
源之女公皇明萬曆二年我 宣祖七年田成
生 孝宗六年乙未歿年八十二孺人居昌慎
氏司宰監正仁恕之女温恭薦厚公事父母居
昆弟姊妹各盡懽心亦稱婦人之賢完公二十
三年歿合葬之墓在今勿法厚理谷有二男二

女男世維世紀二婚李惟銓金是燧皆士人公
既歿其遺風餘教亦在子孫可觀其銘曰

嗚呼懷寶遁世不見知而不悔確而和忠慤而
無倚鄉人畏服尚有老德

李幼薰銘

公諱純諱字幼薰我 世祖諸王子德源君曙
之四世孫也大王父蓮城君漸王父仁江君樸
父錦溪君仁壽光海廢 太后率諸公子諫而
得罪 仁祖立復其官命祿爵其子孫母縣夫
人鄭氏贊成申孫之四世孫而司果仁吉之女

也錦溪君四男公為少子受業於李英彥先生
先生修身篤行自事親從兄推至於性命之微
其學以躬行心得為要一時交遊之士皆師事
之公能恪慎克修二十八陞上庠四十六選博
士科當 仁祖二十年以資窮例受成均典籍
尋改禮曹佐郎明年出為嶺南都事又明年復
入禮曹為正郎一年遷司憲持平兼記注官時
掌令李應著諫姜氏賜死事忤 上旨竄北邊
公爭之曰應著徒知責難為恭盡言不諱不怨
其忠遽施之以重法逐諫者塞言路而國治安

者未之有也 上怒公以故連蹇不復顯用也
後為湖南關西都事安州鏡城判官掌樂僉正
沃川郡守斥落十年歿年六十淑人京山李氏
前古名臣李約東之五世孫也先公十九年歿
合葬于麻田郡治東禾津南向之壠有二男一
女女適叅奉申翰宣男云泰云永又庶出子女
二人男云樂女洪德奎妻也銘曰
直道不回窮亦不憂不健羨於高明不感嗟於
卑湫歸與造物者長休又何尤

鄭君墓碣

鄭君諱洱字汝深本迎日縣人高麗密直提學
思道之後也提學二世仕本朝有貞肅公淵又
二世有直提學淮直提學生叅軍湜叅軍生圭
簿滄主簿生希渚希渚生都護府使明海府使
生君母昌原黃氏承旨致誠之女也君為後於
族父縣令濂縣令於貞肅公為七世孫也君敦
厚謹飭能不言而躬行事父母思以父母心為
心縣令公得風痺病君醫藥奉養顏色不急者
十年及其居喪之節吊者莫不曰善行君平生
好任恤善與人忠恪慎順不較橫逆 仁祖六

年家有禍父兄皆死君連坐流日南四年其庶
母閔其家之祀上書乞出繼子免連坐 上特
寬釋之既家破而本生母黃夫人七十必安其
寢處悅其心志以盡天年一姊窮寡無所歸亦
與之同爨而居權愛克順丙子之亂奔竄山谷
客死夫如年三十一歸葬古長湍先兆之次妻
李氏宗室平林君祉胤之女也既娶孀哭之曰
險釁與其無死寧修祀以報其祭祀之禮必忠
慤敬信致至誠之道通載籍舉前古忠臣孝子
貞婦善行以教家敦厚九族家無文具之禮巫

祝淫祀之事壽七十某年月日歿以先葬其筮
不利改卜鳳川上乃合葬焉有二男三女男道
洞道澂婿金夏圭高應文安廷焞又有庶出子
道源其銘曰
躬恪順孝且博刑于家以裕其後昆

記言卷之十九終

記言卷之二十 中篇

丘墓四

洪靜而碣

公諱宇定字靜而姓洪氏本南陽人大王父昱
有隱德高行仕為掌苑署掌苑追爵領議政王
父可臣以儒學顯用致重名 宣祖世守洪州討
平湖西之亂封寧原君致仕卒追爵左議政洪
州有清難碑牙山溫陽皆立祠以祀之父榮漢
城府庶尹母陽川許氏吏曹判書晟之女也公
兄弟三人公最長二弟宇遠嘗以言事斥諫官

擬前海州獄在
光海而居也

字亮連守邊邑以政清聞公卓犖好奇偉不局
東以為名修身潔行其文章亦然崔海州沂愛
其奇才以女妻之二十二舉進士其年海州獄
起崔氏之禍殆無遺類而公亦逮繫經夏每對
獄詞明義直雖當時獄事鍛鍊文致無所不至
而亦無詞而傳死議李爾瞻素重其才名欲令
從已而動以福禍公歎之曰人固有一死無罪
枉陷亦何愧於心終不動今右相元公斗杓判
中樞李公澥素善以布衣陰結當路者日夜以
計解之卒付處天安八年 仁祖克大難大釋

諸囚公既得釋韜晦自隱弊衣放跡傲玩而自
戲也前後除拜皆不就事親色養雖踈節細行
皆人之所不及者人皆曰孝子之行也丙子避
亂大嶺之南卜居奉化縣文殊山下從泉石之
樂因自號曰杜谷從地名云 仁祖召用遺逸
以公特拜工曹佐郎後改泰仁縣監又為司宰
監主簿終不起或謝恩而去及拜黃澗縣監公
已歿矣疾病必衣服冠而朝禰且曰禮男子死
不絕於婦人之手出外舍令究為書與二弟訣
遺教其諸子一以為惡為戒因與客言消息聚

散之常無憾感於死生之變公有瓌才奇氣潔
身遁世肆志於名利之外樂而終身豈不魁然
大丈夫也哉公生於萬曆乙未十一月二十二
日歿於還甲之明年七月二十八日葬於安東
治北三十里憂無洞有男四人克允凭窆女二
人其二婿林震喬俞命世銘曰
嫫母之喜子奢之詈罷牛之駕驥駢之恥高蹈
尚志與物傲戲清士之介可以廉頑夫可以礪
濁世

李揚濬銘

李光源述初其先韓山君人高麗侍中穉之後
其世多達官聞人九世至贊成諱德洞於述初
為皇考母高靈申氏參判湛之女也述初生未
成童申夫人卒其顏色感容容有不忍見者而
里中兒亦以嬉戲相成長則方正堅嚴寡言笑
無戲押居常不衣冠不處人亦不以惰慢居其
側平生樂與人為善非誠信不為好讀書不干
祿求名 仁祖功臣元斗杓李澥徵時與之相
善當光海政亂兩人者私相語試之曰或不幸
有變為上乎為西宮乎時 太后閉之西宮述

初不答亦不復言沈器遠者初從此兩人者亦與之交相好述初語兩人曰吾聞此人無行當絕兩人亦與之交絕後復交驩如舊曰人之言或不然述初曰然此人非吉人絕而復驩莫有謀乎兩人者縱不言癸亥之謀已成矣後器遠既暴貴謀叛事發覺夷其族甲子李适叛入京城贊成公從上南狩至天安衛士夜驚擾亂及行宮百官奔竄述初白贊成公曰事變不可知不可離上前立行宮門外驚定乃已賊平賞群臣從上者有親戚從者皆賞之述初曰

跋涉道路為親故也以從上受賞無義也即避去後天官薦其賢除陵署郎累轉揚溝縣監贊成公已老事繼母李氏父母喜則亦喜憂則亦憂顏色不怠出於至行嘗無病暴遣疾積醫不效二年而述初死於官其所與友者許博汝約聞述初病且死急馳出揚麓三百里與訣述初客死其正終人計歸喪皆汝約述初萬曆十九年辛卯生崇禎八年乙亥死年四十五葬高陽之巖山初娶完山李氏儒生梓之女亦有至性善行早歿子男女二人男鼎慶頗有先人風

慕義有氣槩父客多之婚柳慎吾後娶亦李氏
係出咸平長興都護府使輝陽之女無子述初
又有虞出子一人益慶其銘曰
已乎述初行出乎古人卒使短折而無命天道
不能勝人耶

許佐郎銘

公諱博字汝約姓許氏孔叢之世也 成廟相
忠貞公琮六世孫而承旨昕之孫僉知中樞坪
之子也母先州盧氏公博覽強識不喜舉子業
當光海政亂廢舉且十年 仁祖克大亂之明

年選國子兩試十乍初授司饗叅奉掌燔菴湖
西產土其所掘地多百姓塚墓公歎曰壘壘皆
塚不發人之塚無土寧不舉職得罪遂決去因
事得己人皆嘆息曰善乎仁及泉壤其明年登
大科選入槐院遷承政院注書丙子之亂從
上於南漢既下城因落南夏拜秋官郎尋改儀
曹上䟽言事為被擄人贖還事也所言切直
上採之下廟堂議事竟不行明年春為養出為
任實縣監一年以治理聞當褒賞其十一月某
日客死官所年四十四百姓如悲親戚邑里皆

有追思碑公儀狀俊偉確然能立不撓好潔廉
不以為祿為心家貧為養遊宦遠途卒無命而
歿人皆惜之公平生善事父母李光源述初稱
之曰敬事其親忠養不怠不敢復更忘父母吾
見許汝約一人云宜人全義李氏 贈議政重
基之女也治家教子有賢婦人之德公歿七年
十月某日四十九歿有二男四女男導崇婿金
塾李尚彬柳得輔崔光斗皆士人公及宜人之
葬初在廣津上許氏族葬至 上之十年改葬
永平之白雲山下同塋而窆銘曰

頑鈍者受福良善者無祿天道沈洵禍福之報
其壞

龍門孝子碣銘二十一字

孝子梁姓諱應源字彥長 世祖宰相梁誠之
六世孫也曾大父谷山郡守允精大父司憲監
察思訥父闇早世母宗室李氏 太宗別子孝
寧大君補之六世孫敦勇校尉思安之女也孝
子早孤母老能色養萬曆中有倭寇國大亂奔
竄經年能販業以供給亂後仍卜居龍門耕田
力作兄弟二人皆貴至連帥家無畜積歸則兄

第共財好任恤善與人忠愛恪慎及有母之喪
為之六年不去衰雖禮之過於禮者而君子稱
其至行 仁祖世特旌表龍門孝子之間見世
亂挈妻子入洪川山谷中從巖泉之樂二十餘
年七十九歿其入山中後年清人攻我國大亂
卒有南漢之敗今谷口有哲隱亭前有一邑宰
慕其賢名之云有墳墓在坡州城山梁氏族葬
妻李氏本與 國同姓我 太祖弟義安大君
和之後而國子進 逢之女也先二十六年歿
今其葬同原而異塋者也男修亦有子弟之善

行無子以其從兄弟之子益景為後銘曰
行出於至誠有以成百代之譽請觀於龍門孝
子之間

秋潭處士銘

君諱頴字子儀姓鄭氏本迎日縣人高麗忠義
伯夢周之九世孫也忠義伯六世有光韶光韶
生祥龜祥龜生繕元以壽考秩從二品拜副護
軍於君為皇考妣晉陽河氏我 太祖名臣文
孝公演之後也君天資英發敏學多通其術以
明體適用為要不喜崖異篤信善行士聞君之

風者言慕與之交其居家事親必安其體樂其
心恭敬忠養至老不怠兄弟四人共財而居教
行於家精於本草善岐黃之術好施與勸遷徙
無田者耕於海上秋大熟得穀百數悉散與貧
交疏昆弟不有之曰非為利也欲立義庄不累
棄之既志大而行潔不肯從人自售樂居岩泉
自號秋潭居士業禎末吾落南與君入海登臨
九井欲觀於靈祠君不從吾心敬之以為不如
朝廷下州縣選才學士州家舉君者非一而卒
無推挽者沒而不見嗟呼天之降才若有待而

或湮滅而不稱者命耶天道福善禍淫自古善
人者多如此何也君生於萬曆二十七年四月
十九日歿於上之八年八月二十一日年五
十九葬於牙先兆之次在晉州治南二十里妻
昌山曹氏同原有二男挺擣擣進士又有庶出
子擅銘曰

嗚呼孝且惠質而翼揭揭良善之特

師尚父曰五宗安之曰孝愛人好施曰惠名
實不爽曰質思慮深遠曰翼

肆

金夏圭玄瑞殯表

金夏圭字玄瑞慕齋金文敬公五世孫也家貧好讀書常誦易通聖人畫卦之旨先天後天之法樂山澤之遊慕竒古拔俗別號竒廣其文亦然讀之多警人者不幸無命四十七死君少喪母父老無他兄弟而死其一女已嫁餘二子女皆幼又一子生才三日君死亦客死其妻之兄鄭道洞子中飯用嘉蔬解衣而殮置銘于肆埋之臨江南其族葬之地文敬公墓下其坎見衽蓋殯也君生於仁祖克大亂之五年某月某

甲死於寧陵崩改葬之年十月戊午君將死嘆息言曰親老而不能養妻子凍餓而不能恤吁嗟乎命之卒矣君死之夕忽晦冥大雷疾雷暴雨此何也君同與萬物遊於世不健羨於厚大不苟笑而趨俗喜鼓琴有高蹈特立之氣長辭歸化之感然耶抑異氣之變化耶

遺事

禹侍中遺事

禹侍中諱玄寶字原功丹陽郡人稽之麗世家麗史本傳恭愍時以文學進為春秋檢閱轉至

左司諫大夫。禡二年以密直提學進政堂文學
為門下贊成事。十二年十月與判門下府事曹
敏修贊成事。張子溫簽書密直司事。河崙如元
謝命謚襲封事也。十四年春王出行西海令留
守王城發五部丁壯聲言從王所大獵實攻遼
也。其五月太祖回軍禡特拜右侍中禡廢罷
侍中。昌二年金行獄起以迎禡於驪興陰與益
陽謀作亂郎舍伏閭請罪昌不聽免官而已。尋
判三司事恭讓立有尹彛李初事逮繫赦出許
外方從便臺省以為不可宥付處鐵原尋召復

其官及益陽死安置雞林其明年高麗亡太
祖賜功臣爵號辭不受上特厚賜之待以故
舊之禮請歸田里特進丹陽伯時公歿矣年六
十八追爵領議政謚忠靖後子孫每以十月上
日修祀事其告享之文曰孝後孫某敢用粢盛
醴齊祇薦歲事于先祖考高麗門下侍中府君
流離去國興滅之際苦心之操危身之忠以遺
我子孫後世先祖妣竹山朴夫人配食尚饗墳
墓在古長湍東二十里金谷

記言卷之二十終

記言卷之二十一

中篇

羈旅

經亂後仍流落嶺海十年其間文字可述者
如山川樓觀謠俗土物死生遷徙送別之作
各分類編次而其餘雜稿六十篇總名曰羈
旅

答從兄書

前十二月在宜春長興人自聞韶來者過去得
一書春夏間庶弟上京中道還歸來從嶺下又
得一書嶺海五百里間一年兩消息而已良用

悵嘆去歸之途天時苦寒又阻雪嶺間仍寄留
峽中嘗見嶺傍之郡皆地瘠民貧雖以舊居世
農尚難積穀為餘饒而今以遠客一朝假居何
以取資也今年旱災數年來尤甚自三月至八
月不雨山澤之間多積雲行雨枯旱猶不甚耶
聞間居中應接生徒講論古書又其山水幽麗
多奇頗可自娛餘外之艱辛不足為動耶春初
從生理移去晉州海上海上多盲風恠氣一日
之間昏陰異變其疾多痞結積聚雖有海錯異
產多逢奇恠不知其性從人日食嘔泄大作數

日乃安冬寒不見積雪堅冰水草如春蟄虫不
俯其俗尚淫祀咀呪日夕妖巫握火呵叱鬼魅
此皆南遊遐遠恠觀纔留數月遂來甘界海隅
風氣習尚蓋大相同而小異然後乃知南海之
多珍恠富饒不如東境之清爽故誌載日出扶
桑瑯琊又自古魁梧奇偉之士能忘世於海上
者多稱東海之濱而不言百越之南者蓋亦以
此遠來已久世變人事凡耳目所感其於眷戀
丘墓之思渺然尤難而徒轉徙千里亦已五年
六年羣兇戲傍日作結束晨炊相隨道路之狀

安得俎豆禮法之則以為兒子效也昔孟子生於三代之末其母猶得擇地而居子世道之亂人事之變至如此時則雖以孟母之勤於其子流離道路固不暇擇眩鬻築埋而不過其心孜孜耳來書三遷之譏徒增戲劇炎方鬱燠如空蒸炊加以環山峻急水深石頑下則濱海沮洳又多虫蛇毒螫無所出遊庭間積恠石數重間移石草蔓施岩隙頗有竒趣倚植竹菊數叢時寓娛玩於此耳然頗無久意又所急在生理心自笑自移海上海竭三年取食三遷卒遇大饑

無非命物者之所驅如此頃因寢卧夢得水雷之屯苦旱悶渴感雷雨之動滿盈耶處屯艱之世鬼神示兆誘我以貞固之道耶許生三月移去山陰自此道里不邇相聞阻絕每想其資依貧薄不能忘念而無以相恤其始來之初宿病大發殆入死域其子斷指食血得回其生息隣里感動遠近皆言之夫孰不有慈子慈父之慈而此蓋人之所難感嘆不已和順丈頃年關東之行歷拜於原州髭髮不衰笑語康寧以初逢經亂之後館留浹旬戀戀皆是前日意心自悲

先人親切之交惟此丈在世而別來已三年矣
隔遠無路致意人事奄忽遽聞凶訃中心怵怛
追思無窮韓生輩前聞來見云云而想其田家
多事安得如意

又一書

海陬卑濕加以溽暑淫雨彌旬月矣不見晴天
白日如入蒸炊大病餘氣力在困風雨中茅屋
壞漏房室盡濕竟夜不得安寢因一假寐成夢
得開晤頗穩歷歷如平日覺來恍然如相對纔
別此時依黯尤難為懷朝則手扎果至大喜可

知夢者人事之兆寂寞中尤可驗如此自苦之
責誠然而勉為恬然無所動則難矣自亂離來
五年生涯日艱難丘墓隔遠且入遲暮之年如
秋風動其氣寥慄而自悲况親故之顛沛流離
而死者屈指可數人事忽忽寧可獨期其久長
哉人情所感安得不嘆且悲也自非聖人賢人
天機泰然生而順死而寧者凡下此者率多強
而排之耳其中固不自若也故亂世之音憂鳥
將死則鳴哀夫樂與鳥其聲固不期憂且哀而
自然感之者如此人之情非必感感於窮苦亦

時之有所感適然耳理固如此也然孔子厄於
陳蔡之間十哲之徒從之而至於七日不火食
孔子絃歌不輟其弟子不愠不怨者顏淵子貢
數子而已若子路以下固不免也以吾竊竊然
企及古人而不及又安敢望古人之所難能者
哉要以理自克不至汨沒而長終則亦幸耳擬
而以靡弊潰亂不可收拾之勢奮發當事其所
作無不偉然而以謗去恨不得與此公相對嘆
且云云也今猶在界上幸傳此所寄書此時淪
落無窮更無路會合悵然悵然六月廿一日

又一書

入春後海邊雪暗多風陰曠中見雪山凌空氣
候悄然無異窮北况大嶺間苦寒如何兩不聞
消息鬱陶已經歲矣每念閒居中日接生徒講
論前古其樂可知而前者傳聞書室失火恨傳
者不詳幸而書籍皆出耶或出而卷帙多缺耶
或不幸而不出耶吾儕平生遇事常多困厄無
聊獨於觀書求古人之道自謂餘裕而卒亦如
此實天之所窮可笑奈何落南已八年常恨為
客苦久此中親老無恙為私幸萬萬前十月進

來此苦言生計艱難為從來相寄托之計而還
去未久得病死嘗見其髮盡白形貌盡枯私恠
其數年之間何遽衰落至此奄忽而死增悲悼
貧無力嘗乞葬於其官而未知感動否也嘗因
出遊得咸安江上一區從青松寺沿江數里巖
岸峭絕傍有陂池可以容舫宜蒲荷望平沙廣
野臨江釣魚足以閒暇但其地下雨則常多沉
沒其民幸數年一旱得不飢故居民少而江上
多荒地聞前年東海之遊嘗於亂中羈旅東畧
外數月涉冬徂春行歷五六百里獨不及太白

之外蓋大嶺之東竝羣峯積雪望日月之出東
海皆沙海海上皆沙往往有深松大澤竒巖其
名區絕勝至今十年之後每想東海之觀懷抱
爽然對人論遊觀之樂又未嘗不疊疊在此九
月嘗到泗川與數儒生相從入海過南海大戰
碑觀虹門九井炎方海氣常煖多草木恠麗之
竒海晴則耽羅日本皆可望而又其外無窮自
逢多亂流離極南近十年以窮大荒平生樂讀
古書自以為終此足矣及至此然後乃知天地
之大造化之無窮不可以徒讀得之也春來欲

往從嶺中山水為旬月之期嘗於闡堀下遇太
白僧道應問其道里太白去小白加遠而東極
海上如石碯聖穴覺化浮釋皇池五寂在二山
之中登陟無人之境二百七十里間山中多異
草木無虎豹之害浮釋稱息沙井又禪花在佛
戶徇承露則枯云又言剡峯皇池之勝思一遊
其間因入白雲洞求藏書觀百家同異則遊亦
足矣甲申正月十一日

與趙日章書

吾子以多病遠使海外絕國增為相愛者憂萬

萬豈特白首離別之思而已君子事君夷險一
節於吾子固無所動心也天下之理一而已雖
絕儻殊俗氣化殊別其性一也苟以誠意示之
何所不服使海外蠻夷知朝廷有骨鯁直道之
士嚮風歸義莫敢以無禮加我古之使絕國者
其道如此君子責其所難而不諂其所能古之
道也吾子以為何如也雖當敗壞危亂之際猶
賴一事一言得復振作其遺力豈非賢大夫之
烈也惟吾子勉之穆轉徙極南今已經兩歲於
海上與人事愈踈絕矣風濤萬里日域渺渺行

履慎重不宣

藏巖水石記

十七年夏吾寓居漆園與其鄉士人黃生裴生觀藏巖水石入洞四五里山深谷長多茂林高壁竒巖多蘿薜有石獨立蒼然高出林梢者曰藏巖其下溪水清淺多儵魚其上石灣其下石圩多積石間有潭水吾與二生坐石上相與指點某可浴某可濯俄而山雨暗谷石洞煙暎如畫上有石田山村有鍛鐵者居之且長子孫矣蓋古時必有逃名遁世者居此因有藏巖之名

而傳於後世耶出谷曰柳洞黃氏世居為舊業云

長壽房瀑布記

觀藏巖後四日遊長壽房此古廢佛宇而山中巖石竒處東南對石壁層巔崖谷之水合流至石壁為瀑布懸流五尋其側皆深樹堪巖多厚陰積氣盛夏其氣常寒七月山水益清冽當瀑而沐能療風明目其上鷲峯絕頂極高峻常多雲霧出山有村落曰白鵝洞沿溪水有竹林古木盤石吾寓居溪上日遊其間其俗淳朴多壽

考有八十九百年者

石菖蒲說

余數年前遊海上登天冠山於般若南石峯上
窺石圩泉冽水氣盛苔蘚常濕大旱不涸其中
產菖蒲其根蟠結石上如虬結不知歲月山中
人指為神卉此草木志所謂堯韭久服輕身聰
明不老一寸九節者通僊靈余採之東行四百
里種之閩嶠山鶴峯陰崖泉石間浮屠人靈運
得之種之靈覺洞巖泉上余又得瓦鼎種之常
玩焉宜瓦石上宜天雨水不宜河渠汙井性好

潔怕烟塵氣南方山石間產蓀草謂之溪蓀其
莖葉香冽耐寒冰雪上常青其根類菖蒲特其
葉無脊耳鄉醫誤用之伊上鄭子儀讀古書好
博雅通知草木之性作石菖蒲說以問之

陶丘公事

陶丘公李姓名濟臣字彥遇後逃世自匿以愚
易遇陶丘其所居地名以自號而後人謂之陶
丘公公少之時從安宙先生學尚書毛鄭詩弱
冠遊國學與金範裴紳齊名為友好詼詭奇偉
日遊名山澤放歌傲玩以自娛至今晉州德山

洞其老人相傳陶丘公山居古墟從泉石上下有三處蓋樂居岩泉久則輒移去云事南冥隱者其弟子傳載其事頗詳凡世之言陶丘公者多奇怪可駭不可信嘗遊天嶺與太守遇食於郊忽鼎鳴有螿蓋飛躍而上有如鬼神焉陶丘公即起曰此不食肉之兆於是我榮靖王薨陶丘公少為後於族祖祖家多積財富饒而陶丘公不有之盡散與貧交疎昆弟謂子孫曰使汝飢寒者吾也不久東方有大亂雖有厚積大儲終無所守之其後果有倭寇大亂七年七月

三歿其年曰有死兆自言死期死之日早朝而作吟哦自若日晚且問之曰日已巳時乎曰巳時悠然而化其夜有光明照人傳者以為神宜春閣岬下有陶丘公塚

趙晉州遺愛碑

侯之為牧於晉當黑漢克我之二年三年間自我被兵之後南方州郡視北東西諸路獨完而陸海之產凡百物之輸於北者與其召兵之際軍費共需皆出於南方而嶺北之遭亂流離而就食於南者又踵相接也晉於嶺南最大號為

饒州而財力坐耗加以連年水旱民事大困侯
既上任悉召父老宣布朝廷德意革罷積弊無
名之稅若干條出捐歲入常捧之外又得各目
逋欠贖入千數不責於民以應百需菲飲食惡
衣服以勤已而足民年月之間治境大蘇愁痛
既定又治軍旅繕兵械激礪士卒令皆有爭死
長上心於是傍邑數郡之守宰亦頗相慕效為
治越明年都堂缺舍人以侯召還州之父老羣
吏士以至農工百隸與四方之羈旅而至州者
無所賴而得生如失慈父慈母咸願刻石以不

忘侯之遺愛云侯諱某字某姓趙氏漢陽人

柳內翰銘

君諱命立字樂夫姓柳氏其先本文化人君聰
明秀雅早有名譽既登第選為藝文檢閱年尚
少君家世昌大前時富貴之盛赫然可畏君斂
避退守勵行自飭及柳氏敗君竄日南自長興
至巨濟窮極海隅憂愁辛苦感嘆常自悼 仁
祖十四年因大亂寬赦囚籍於是君始出海而
無意北歸因流落昌原海上時吾逃亂出嶺亦
以羈旅至此得與君相見相喜相知日深君困

而自裕窮不易操善乎士窮其志可見君嘗在
太史當昏亂無紀多直筆可明後張公維李公
蔡修國史見之憐其無罪久斥將力為推挽未
久二公死而不果海濱風氣不清苟非土人眩
瞽痞結多奇怪疾落南者十病八九君卒以此
客死昌原年四十八其年以喪歸葬濱陽大江
上王忠曾大父潛大父自新父希奮皆前時貴
人妻尹氏鈴平君重三之女有女四人其壻成
億昌趙時瑗成玠尹勉時瑗以科目進為固城
縣令公無子尹孺人取君之兄弟之子是善托

其祭祀也既葬君孺人以吾嘗見知於君乞一
言求所以表其葬者吾為之泣謝感而為之銘
其詞曰

蜿蜒西牖而北靡於其音曉乘而盈耳故國之
戀已而寧與日處而嬉蓬然歸化而長遺漠漠
者無知結髮婦之悲

記言卷之二十一終

記言卷之二十二 中篇

善行

吾避亂出嶺南得絕行三一文繼達二權乙
三東萊嫗皆前古之所罕有者也識之以為
江右善行之首

乙初見寒岡先生先生字之曰次甲者也
嫗無子死父老皆曰賢嫗也葬而封之咸安
放牧問東萊嫗塚

江右三絕行

孝子文繼達不承葬標

文繼達丕承其先本湖南之南平縣人中世徙
大嶺之南自其父祖始居三嘉縣竝木里君武
人子雖無所學有至性其鄉有隱君子曹敬德
先生者以女妻之君父事之其父任嘗得叛奴
訟而治之反為所賊殺君日號哭訟於方伯讐
族類強力行賂以求脫君與母訣曰讐不復誓
不與共生為之七年不除喪轉訟數郡羸毀愈
苦南方之人土感其行爭與同讐之讐計不知
所出日夜為反殺之謀君辛苦羈旅悒悒困不
得理常礪劍欲必闢而死嘗過峽中日暮獨行

有猛虎怒當路若令之莫之前者良久適有諸
生應舉者偕至虎乃去遂前行讐果挾白刃潛
伏山谷見多人至謀沮欲散去君遇之奮呼抽
劍搏鬪諸生大驚共執讐告郡邑治之果首謀
者辭服太守為之驚嘆賢之其叛奴窮自言盜
殺主者十四五人而皆殺之君力竭死途中無
子君死而其所乘馬亦流涕三日而死鄉邑父
老為之涕泣相語以為南中孝子之異蹟悲乎
怨毒之感尚喻於禽獸而况於人乎三年夏吾
南遊入其鄉逢父老問其事孝子死已三十年

鄉人莫不感其至行亦稱道曹敬德先生其弟
弘達請刻石以表其葬

孝子權乙

權乙字次甲昌原上南海上人也乙以乙未歲
生故父呼曰乙而父死不改因遂名之父當丁
酉之亂奔竄海島溺海死時乙幼無所知及髫
鬣始有知從羣小兒戲嬉而歸問其母曰兒皆
有父而我獨無何也母於悒曰汝唯童騃無所
知遭亂父涉海死海中吾與汝孀孤無所告零
丁至此因泣之乙驚痛悲傷之自此凡食物之

出於海者皆不食終其身不嘗對人言笑作權
言及父必涕泣家苦貧勤苦力作以事母日供
甘旨以養餘力則讀書事母三十餘年母以天
年終喪必盡其禮既三年因不去其廬為父三
年哀毀如初人皆以為善行而浮屠禪學化之
乙居喪六年之明年死而大疫闔家皆亡其二
子幼釋飢寒無所依有父客憐之欲育於家教
之如子二子辭曰以先人之故欲收恤其遺孤
然不欲以三年之哀去哭泣之次不從聞者皆
嗟嘆賢之

讚曰乙幼無所知生九歲能立行如此長則又學以益之又教其子以禮賢也治西安城里有孝子塚觀察使林公潭追其善行恤其家

東萊嫗

東萊嫗者本東萊私娼也 昭敬王二十五年有倭寇大掠貨寶婦女而歸嫗三十餘被擄至倭中十餘年矣三十九年春有奉使者還倭既和親還前所擄獲人口嫗亦得還嫗有老母當亂相失歸問其母皆曰亂中亦被擄不還蓋母與女俱在倭中十年不相知嫗私與其族訣誓

不見母不還復涉海至倭中行乞道路積苦海島遍國中得之母與女皆老而其母七十餘尚無恙倭人莫不大驚嗟嘆賢之皆泣下傳稱之聞於國中其酋長則許其母俱遣之嫗以母既還鄉土失其資業無所料生則與其姊負母轉客江右住咸安放牧里其母以天年終姊與妹相依為生日傭任以取給凡得一衣一食必先姊而後已嫗年八十餘死其里中皆呼曰東萊嫗因以為號云嗟乎以女子能涉海萬里絕國艱難海道得母子相遇天也自古男子之所不

能者而能之能立絕世之行至使蠻夷感化賢哉

金溝柳節婦旌門記

節婦柳氏縣令漳之孫奉事匡民之女而儒生宋昉之妻也柳氏出嫁之年其夫死勺水不入口號哭不絕聲積四十餘日吊者大感常以死誓心舅姑知其有必死志晝夜守之常引古譬曉又泣謂曰吾兒不幸早夭而無子鬼神無所托忍死終年無絕其祭祀為已化者亦無憾也其心以為祭有時而盡死而同穴無窮陽示之

若返而無死意者守之少懈及葬有日晨則盥擲正衣服而經自殺聞者莫不酸鼻皆曰賢哉節婦之行也年二十縣令金景說以事聞又縣父老金地生等上書言之天啓二年表節婦之間上之九年二月戊戌孔巖許穆記

節行傳

李文忠公側室女事

見完善君墓碣下

積城百姓李貴男妻丙子之亂匿於山中為賊所逼行過其廬立不動賊拔劍斫其膚剗其腹而殺之有畜狗守之三日三夜烏鴉不敢食鄉

里稱之曰異哉烈女之行也其畜狗亦知以義相報云

私屬縣北江上人趙男為兒時其父死於壬辰之亂不知死處既長為之追喪三年老而死謂其子曰我死毋埋我棄我於野安我善也其子不忍也衣之以薪掩其體而不穿不封嗟乎亦可謂孝子之心也

記言卷之二十二終

記言卷之二十三 中篇

戒懼

出林塢作不如嘿社誌八十有三言

出於妄皆過也皆曰過也言不可逝也駟不及舌故曰口生詬口戕口口之不慎禍之招也而况多言多敗乎恥過莫如戒心守口莫如慎嘿慎嘿者寡言寡言則戒專戒專則過寡故名吾塢曰不如嘿社書之以自警

五家十家為田社是私社古制各樹其土之所宜木

不如嘿田社老人十六戒

聖人不語恠力亂神怪反常力害德亂悖道神
惑人此聖人之教也老人垂死戒口過十六其
戒曰

行言戲譎聲色貨利忿彙擣諂佞苟私矜伐
忌克恥過澤非論人訛詬倖直傾訐蔑人之善
揚人之愆時諱世變有不慎者小則生詬大則
戮及其身宜戒之

喜怒哀之戒二十言

妄喜恥隨之妄怒詬隨之喜怒哀者恥詬之媒慎

戒必齋

自警二銘

自私者欺人天理昭著人不可欺徒自欺耳故
誠其身必自毋自欺始

敬親者一舉足而不敢忘父母毋服闋而招咎
毋履險而危身愛親者一出言而不敢忘父母
毋苟訛而招詬毋苟笑而媚人

自省箴

心之官則思亦行有九思思則得不思則失不
莊不敬怠惰放肆皆不思之咎可不慎歟得正

而斃古人勉焉勿以老死自畫書之以自省

百拙箴說

老人才拙學拙心拙志拙言拙行拙百試而百拙故名吾居曰百拙箴名不可外求出於性者然也所以識拙毋妄動之戒也

樽銘

戒之哉君子哉毋醉毋亂惟德將哉自古敗德滅性覆邦喪家矧莫非酒德荒哉故有剛制者存而沉湎者必亡戒之哉

立春之戒

天道變易歲將更始老人今年八十敬戒寅畏追過省譽遷善日新庶幾免恥惜耄老死之年悔尤尤多得正而斃古人所勉勿以年老少懈書之以自儆

甲寅立春癸丑臘後十六日申正一刻眉叟書

記言卷之二十三終

7

